

名每名月支餉銀三兩三錢擬照設每名月支餉銀三兩三錢 駕車兵四名每名月支餉銀四兩五錢擬歸併車夫項內 喂養夫四名每名月支餉銀三兩三錢擬改設車夫八名每名月支餉銀三兩三錢 隨營車四輛查南方不用騾車擬改設人力扛車四輛 駕車騾十二匹每匹月支乾銀四兩八錢掌鐵韁繩二錢四分擬不設 以上每營擬設員弁自兵計六百四十五員名月支薪公餉銀三千零七十六兩三錢奉 硃批覽欽此

廣西邊防大臣鄭奏桂省邊防應行分年籌辦各事宜摺

竊臣於光緒三十一年二月二十日欽奉電 旨鄭孝胥電奏病勢轉劇仍請速舉替人俾免廢弛等語著岑春煊李經羲會商妥議奏明請旨欽此跪讀之下感激莫名伏念微臣蒙 恩特擢守邊二年雖竭其駑鈍悉心經營而限於財力志所欲爲迄不能辦上負委任撫衷滋愧惟閱歷稍深權其緩急有可就目前餉力所及分年辦理之務謹舉其尤要者三事敬爲我 皇太后 皇上陳之一曰電線不可不設也現在邊防惟中路電報可達鎮南關東西兩路千餘里均未設立查西路之鎮邊縣歸順州及安平太平下雷各土州東路之甯明州土恩州明氏廳上石下石恩陵各土州皆萬山叢雜各對汛相距甚遠消息隔絕遇有警報必需十餘日之久方達龍州調兵赴急緩不及事而邊防兵力單薄勢不能處

處分繁土匪竊發各營無從得信飛機堵截賊已遠遁如那波邱匡平孟愛店九特各汛有急常繞出越南詣法人電局電告龍州軍情洩漏深爲不便臣前商之督臣岑春煊擬將東路電線從龍州接至上思廳以通廣東西路電線從龍州接至百色以通雲南兩路約長千數百里估計工料需銀八萬餘兩以軍餉方絀未能舉辦臣焦思默計目前籌款誠難若能就邊餉五十萬兩內竭力設法節省每歲劃出一二萬兩遠段安設分年辦理不過數批可以竣事此線果成則聲息相聞沿邊聯爲一氣雖兵止五千可抵萬人之用使邊防全局俱振關繫實爲重要如蒙 飭部另行指款開辦則一年之內便可告成籌邊之務似無更急於此者此電線宜設之情形也一曰礮隊不可不練也守邊利器首重礮臺而廣西沿邊各礮臺全不合法實無一臺可恃亦無一礮可用將來通盤籌畫擇其要隘另購巨礮另造暗臺萬不可少然非備有二三百萬之的款不能舉辦今爲萬不得已之計更出刻不容緩之策惟有先練陸路礮隊及過山礮隊數營以備攻守之用但礮隊之餉重於步隊目前無款可籌或俟電線既設之後抽出步隊一二營改練礮隊先立根基以爲推廣之地防邊之務亦無更要於此者此礮隊宜練之情形也一曰農工不可不興也邊境漸平民多歸里而生計愈蹙無以爲業鑛路興辦無期惟有提倡農工使得自食其力臣延集沿邊士紳與謀教

養之策勸其選擇聰穎子弟前赴日本專習農務工藝并將東西各國民無游惰之情形詳加開導聞者相告頗為踴躍由臣資助東渡者已有八人現在願往者或奔走數百里來龍州求見而苦於籌款無措不能盡成其志竊謂民智未開恃官代謀生計民智稍開皆能自謀生計然非國家導之於始則風氣無由開通以無業無智之民窮不聊生相聚為盜自救一日之飢寒其情極為可憫其患亦不可勝言臣再四籌思擬在邊防協餉五十萬兩項下每年指撥銀五千兩專為資遣出洋學習農務工藝之經費將來即由邊地各州縣考選才優品端之生童咨送日本分科學習約以十二人為額卒業歸者則續送以補其額不過數年可使沿邊千餘里競趨於農工之途技藝大興荒蕪盡闢僻陋樸鄙之地一變而為富庶禮義之鄉其效非遙當可坐致且守邊之計守之以兵未若守之以民果民智大開人人有厚生利用之能有忠君愛國之惻則雖強鄰密邇無從施其窺伺越南與我接壤自法人既佔之後益加錮蔽其民務令愚而易制觀其情狀使人不平今亟教育吾民使彼有所忌憚似不可視為緩圖此農工宜辦之情形也以上三端乃切實下手之法如蒙 聖明採擇擬請明降 諭旨飭令照辦臣渥荷知遇雖以病去猶欲披瀝上陳以冀有補萬一謹 奏

浙江巡撫聶奏仿照蘇省製辦飛划片